

UTHM perkenal kursus baru

Batu Pahat: Pusat Kokurikulum Universiti Tun Hussein Onn Malaysia (UTHM) memperkenalkan kursus baru berteraskan Liberal Arts bermula semester dua bagi sesi pengajian 2013/2014.

Pengarah Pusat Kokurikulum UTHM Profesor Madya Dr Ahmad Esa berkata, penawaran kursus itu bagi memberi lebih pilihan kepada pelajar UTHM mengikuti Kursus Kokurikulum Berkredit selain kursus berteraskan Keusahawanan, Kepimpinan, Kesukarelawanan, Daya Usaha dan Inovatif, Kebudayaan, Sukan dan Pengucapan Awam.

Menurutnya, idea memperkenalkan kursus kokurikulum berteraskan Liberal Arts dicetuskan Naib Canselor UTHM, Profesor Datuk Dr Mohd Noh Dalimin.

“Naib Canselor (Dr Noh Dalimin) berpendapat kursus berteraskan Liberal Arts dapat menjadi pemangkin dalam melahirkan pelajar seimbang dari segi jasmani, emosi, rohani, intelek dan sosial, terutama apabila kebanyakan program di UTHM berteraskan disiplin kejuruteraan.

“Kementerian Pendidikan sebelum ini turut merangka memperkenalkan pengajian ilmu liberal sebagai sebahagian modul di universiti tempatan, selaras pelaksanaan Pelan Pembangunan Pengajian Tinggi 2015-2025.

“Antara kursus kokurikulum berteraskan Liberal Arts yang ditawarkan ialah Sains Politik, Pendidikan Wanita, Sukan dan Kecerdasan, Kewartawanan dan Kekeluargaan. Pusat Kokurikulum UTHM juga menggubal kursus berkaitan Alam Sekitar, Budaya dan Ekonomi Antarabangsa selain pelaksanaan kokurikulum Liberal Arts berlainan dengan kursus kokurikulum lain,” katanya.